

► *Minister Rudy Croes*

ASOMA tabatin 7 aña na soño

Relaciona cu otorgamento di permisonan pa banda internacional

ORANJESTAD - E Asosacion di Musico di Aruba, ASOMA tabata bao di critica ayera dor di e Minister di Husticia Rudy Croes. E ultimo aki a duna di conoce cu el a tuma nota berdad cu ASOMA lo no ta mucho contento cu su maneho relaciona cu otorgamento di permiso pa bandanan internacional por actua na Aruba. E ta straña su mes pa e actuacion aki, ya cu durante e ultimo 7 añanan e organisacion tabata na soño y cu awor nan kier purba di bin afor bisando algo.

Minister di Husticia abisa cu durante e ultimo 7 añanan tabatin un solo persona cu tabata haya tur e permisonan pa actividad y cu e tabata bende nan cu otro nan cu tabata interesa pa haya permiso. E cosnan aki no por y toch e tempo ey ASOMA a keda keto y a permiti esaki sosode sin cu ningun dia ASOMA a critica of

manda carta pa ningun Gobierno.


Awor cu e ta treciendo ordo bek den e proceso aki, di ripiente ta sali critica for di e seno di ASOMA. Mas leu ainda e mandatario a duna di conoce cu el a manda pidi ASOMA pa na momento di duna un conseho pa bandanan internacional por presenta na Aruba cu e kier mira dos firma bao di e conseho, pero te cu aworaki ta un solo firma ta biniendo. E ta puntra su mes cu si e mester sigui e consehonan di ASOMA ainda den henter e asunto aki. E no ta mira mucho seriedad y elo mester bai evalua awor ki paso e lo tuma den e problematica di duna permiso.

El a reconoce berdad cu tin un hende a haci peticion pa algun fin di siman, pero e no a dune tur tampoco. El a splica cu nos ta referi aki na permisonan pa bandanan internacional y no bandanan di

Antiyas, pasobra aki tin un areglo cu e bandanan di Aruba por bai toca na Antiyas cuanto cu nan kier y vice versa tambe.

Di otro banda e mandatario a recorda tur hende cu su maneho ta cu por bin un solo artista of banda internacional pa luna. Esaki ta pa evita cu tur fin di siman tin artista internacional ta presenta na Aruba of dos artista den e mesun fin di siman.

Finalmente por sinti cu e Minister no a keda mucho contento tampoco cu e hecho cu ASOMA a manda un carta pa Prome Minister Nel Oduber denunciando e actuacion aki. E ta haya esaki un falta di respet enorme di parti di e organisacion, specialmente pasobra nan sa cu ta Minister di Husticia ta atende cu e asunto aki. "Pero no ta nada, asina mi ta siña conoce mihor ken ta mi amigonan", e Minister a finalisa su entrevista bisando.



Minister Rudy Croes